

16 Schimpans und Pavian

T./M.: Felix Gisler 04.2007

Dr Schimpans und dr Pavian
sind beidi midänand verwandt,
hennd beid dr glyychi Ur-Ur-Ahn,
doch das beriärt si nur am Rand.

Si hennd sich jaarelang verträit,
zwar nit als wirklich dicki Fründä,
worum si sich denn doch entzweit hennd,
cha niämert ä so rächt begründä.

Diä eintä gännd äm Schimpans d'Schuld,
denn was är gha heig, heigi ihm niä gglängt,
är hebi dur syy Ungeduld
dr Pavian vum Platz verdrängt.

Doch git's äu anderi, wo meined,
das syygi äbä umgekehrt,
dr Pavian heig ständig gschleined,
dr Schimpans hebi sich nur gwehrt.

Wer sell das chennä eruiärä,
wiä's wirklich gsyy isch hinnädri?
Si tennd sich beidi drangsaliärä,
und keinä wott dr Schuldig syy.

Und will dr Stryyt tuät eskaliärä,
misched andri Affä äu nu dri,
mä wott am „Rundä Tisch“ probiärä,
ä Löösig z'findä mit Diplomatie.

Am Tisch, wo sell verhandled wärdä,
machsches besser dyyni Oorä zuä!
Äs teent halt wiä in-er-ä Affähärdä,
da riäfft uff z'Mal dr Ober-Aff: „Ruä!“

Är redet allnä tiäf i ds Gwissä,
vu Friidä und vu Zämähalt,
und folgendes isch kurz umrissä
vu syyner Reed dr Sinngehalt:

„Chumm, mer wend jetzt Friidä schaffä,
Miär mennd drfir nur eis yygsee:
Äs het doch gnuäg fir alli Affä,
Was wemmer eigentlich nu mee?“